

四明叢書

張宗祥



宋元學案補遺卷十七

目錄

橫渠學案補遺上

橫渠先緒

補張先生迪

高平門人

補張先生載上

牙之齒牙和遠

約園刊本

宋元學案補遺卷十七

後學 鄧王梓材同輯
慈谿馮雲濠

橫渠學案補遺 上

橫渠先緒

補

張先生迪

雲濠謹案先生爲橫渠之父
國朝雍正二年從祀崇聖祠

高平門人

補

獻公張橫渠先生載

雲濠謹案先生淳祐元年從祀廟廷國朝雍正二
年改稱先賢

梓材謹案黃氏日鈔載諸儒從祀封爵云嘉定十四年知漳州魏了翁又爲橫渠先生請謚博士陳公益請謚達禮部侍郎請謚或明或誠了翁入爲太常少卿定謚曰明宋史本傳亦云嘉定十三年賜謚曰明公李氏道命錄云禮部侍郎衛某議於明誠中三字內取一字用之華甫時爲太常少卿擬用誠字及考諸謚法則至誠感神曰誠議者以爲不可用遷祕書監去奉常迄今未定也李氏序道命錄時在嘉熙三年之五月是先生之謚時猶未定或卽定於是年本傳所云嘉定十三年殆嘉熙三年傳寫之譌要其謚明者爲有據也而熊氏性理羣書迺曰謚獻豈其後又定謚爲獻耶梓材又案郝文忠公爲周子祠堂碑云一傳而得程顥程頤張載再傳而得楊時游酢之集大成於朱熹似以橫渠爲周子門人蓋在私淑之列耳文忠又爲太極圖說云邵康節圖先天以盡卦之理周茂叔圖太極以盡易之道張子厚爲西銘合先天太極之旨總爲人道探於宓犧氏之先繼於

仲尼之後再造人極而天人之事
益備是周張傳道之緒也故云爾

西銘

龜山語錄曰西銘理一而分殊知其理一所以爲仁
知其分殊所以爲義所謂分殊猶孟子言親親而仁
民仁民而愛物其分不同故所施不能無差等耳或
曰如是則體用果離而爲二矣曰用未嘗離體也以
人觀之四肢百體具於一身者體也至其用處則首
不可以加屨足不可以納冠蓋卽體而言而分已在
其中矣

朱子西銘注曰天陽也以至健而位乎上父道也地陰也以至順而位乎下母道也人稟氣於天賦形於地以藐然之身混合無閒而位乎中子道也然不曰天地而曰乾坤者天地其形體也乾坤其性情也乾者健而無息之謂萬物之所資以始者也坤者順而有常之謂萬物之所資以生者也是乃天地之所以爲天地而父母乎萬物者故指而言之

乾陽坤陰此天地之氣塞乎兩閒而人物之所資以爲體者也故曰天地之塞吾其體乾健坤順此天地

之志爲氣之帥而人物之所得以爲性者也故曰天地之帥吾其性深察乎此則父乾母坤渾然中處之實可見矣

人物並生於天地之間其所資以爲體者皆天地之塞其所得以爲性者皆天地之帥也然體有偏正之殊故其於性也不無明暗之異惟人也得其形氣之正是以其心最靈而有以通乎性命之全體於並生之中又爲同類而最貴焉故曰同胞則其視之也皆如己之兄弟矣物則得夫形氣之偏而不能通乎性

命之全故與我不同類而不若人之貴然原其體性之所自是亦本之天地而未嘗不同也故曰吾與則其視之也亦如己之儕輩矣惟同胞也故以天下爲一家中國爲一人如下文所云惟吾與也故凡有形於天地之間者若動若植有情無情莫不有以若其性遂其宜焉此儒者之道所以必至於參天地贊化育然後爲功用之全而非有所強於外也

乾父坤母而人生其中則凡天下之人皆天地之子矣然繼承天地統理人物則大君而已故爲父母之

宗子輔佐大君綱紀眾事則大臣而已故爲宗子之家相天下之老一也故凡尊天下之高年者乃所以長吾之長天下之幼一也故凡慈天下之孤弱者乃所以幼吾之幼聖人與天地合其德是兄弟之合德乎父母者也賢者才德過於常人兄弟之秀出乎等夷者也是皆以天地之子言之則凡天下之廢癯殘疾憊獨鰥寡非吾兄弟無傷者而何哉

畏天以自保者猶其敬親之至也樂天而不憂者猶其愛親之純也

不循天理而徇人欲者不愛其親而愛他人也故謂之悖德戕滅天理自絕本根者賊殺其親大逆無道也故謂之賊長惡不悛不可教訓者世濟其凶增其惡名也故謂之不才若夫盡人之性而有以充人之形則與天地相似而不違矣故謂之肖

孝子善繼人之志善述人之事者也聖人知變化之道則所行者無非天地之事矣通神明之德則所存者無非天地之心矣此二者皆樂天踐形之事也

孝經引詩曰無忝爾所生故事天者仰不愧俯不忤

則不忝乎天地矣又曰夙夜匪懈故事天者存其心
養其性則不懈乎事天矣此二者畏天之事而君子
所以求踐夫形者也

好飲酒而不顧父母之養者不孝也故遠人欲如萬
之惡旨酒則所以顧天之養者至矣性者萬物之一
源非在我所得私也故育英才如顧考叔之及莊公
則所以永錫爾類者廣矣

舜盡事親之道而瞽瞍底豫其功大矣故事天者盡
事天之道而天心豫焉則亦天之舜也申生無所逃

而待烹其菰至矣故事天者天壽不貳而脩身以俟之則亦天之申生也

父母全而生之子全而歸之若曾子之啓手啓足則體其所受乎親者而歸其全也況天之所以與我者無一善之不備亦全而生之也故事天者能體其所受於天者而全歸之則亦天之曾子矣子於父母東西南北惟令之從若伯奇之履霜中野則勇於從而順令也況天之所以命我者吉凶禍福非有人欲之私故事天者能勇於從而順受其正則亦天之伯奇

矣

富貴福澤所以大奉於我而使吾之爲善也輕貧賤
憂戚所以拂亂於我而使吾之爲志也篤天地之於
人父母之於子其設心豈有異哉故君子之事天也
以周公之富而不至於驕以顏子之貧而不改其樂
其事親也愛之則喜而弗忘惡之則懼而無怨其心
亦一而已矣

孝子之身存則其事親者不違其志而已沒則安而
無所愧於親也仁人之身存則其事天者不逆其理

而已沒則安而無所愧於天也蓋所謂朝聞夕死吾得正而斃焉者故張子之銘以是終焉

梓材謹案朱子答吳伯豐書改此條朝聞夕死十字作天壽不貳而脩身以俟之

又答南軒書曰天地之間理一而已然乾道成男坤道成女二氣交感化生萬物則其大小之分親疏之等至於十百千萬而不能齊也不有聖賢者出孰能合其異而反其同哉西銘之作意蓋如此程子以爲明理一而分殊可謂一言以蔽之矣蓋以乾爲父以坤爲母有生之類無物不然所謂理一也而人物之

生血脈之屬各親其親各子其子則其分亦安得而
不殊哉一統而萬殊則雖天下一家中國一人而不
流於兼愛之弊萬殊而一貫則雖親疏異情貴賤異
等而不梏於爲我之私此西銘之大指也觀其推親
親之厚以大無我之公因事親之誠以明事天之道
蓋無適而非所謂分立而推理一也夫豈專以民吾
同胞長長幼幼爲理一而必默識於意言之表然後
知其分之殊哉且所謂稱物平施者正謂稱物之宜
以平吾之施云爾若無稱物之義則亦何以知夫所

施之平哉龜山第二書蓋欲發明此意然言不盡而理有餘也故愚得因其說而遂言之如此

又與郭冲晦書曰叢書云理出乎三才分出於人道西銘專爲理言不爲分設熹竊謂西銘之書橫渠先生所以示人至爲深切而伊川先生又以理一而分殊者贊之言雖至約而理則無餘矣蓋乾之爲父坤之爲母所謂理一者也然乾坤者天下之父母也父母者一身之父母也則其分不得而不殊矣故以民爲同胞物爲吾與者自其天下之父母者言之所謂